

Trefniadau ar gyfer Comisiynu Gwasanaethau – Cyngor Sir Penfro

Blwyddyn archwilio: 2023-24

Dyddiad cyhoeddi: Mawrth 2025

Cyfeirnod y ddogfen: 4796A2025

Paratowyd y ddogfen hon fel rhan o waith a gyflawnir yn unol â swyddogaethau statudol.

Rydym yn croesawu gohebiaeth a galwadau ffôn yn Gymraeg a Saesneg. Ni fydd gohebu yn Gymraeg yn arwain at oedi.

Mae'r ddogfen hon hefyd ar gael yn Saesneg. This document is also available in English.

Cynnwys

Adroddiad cryno	
Pam y cynhaliom ni'r archwiliad hwn	4
Ein dyletswyddau archwilio	4
Ein hamcanion ar gyfer yr archwiliad hwn	4
Pam fod comisiynu'n bwysig	4
Yr hyn y gwnaethom fwrw golwg arno a sut y mae da'n edrych	5
Ein dulliau archwilio a phryd y cynhaliom ni'r archwiliad	5
Yr hyn a ganfuom	6
Ein hargymhellion i'r Cyngor	8
Atodiadau	
Atodiad 1 – cwestiynau a meini prawf archwilio	9

Adroddiad cryno

Pam y cynhaliom ni'r archwiliad hwn

Ein dyletswyddau archwilio

- 1 Rydym yn cynnal yr archwiliad hwn dan y dyletswyddau sydd wedi eu cynnwys yn:
 - adran 17 Deddf Archwilio Cyhoeddus (Cymru) 2004 (Deddf 2004) i helpu i alluogi'r Archwilydd Cyffredinol i fod wedi'i argyhoeddi (neu beidio) bod y Cyngor wedi sefydlu trefniadau priodol i sicrhau gwerth am arian o ran y modd y mae'n defnyddio ei adnoddau; ac
 - adran 15 Deddf Llesiant Cenedlaethau'r Dyfodol (Cymru) 2015 i helpu i alluogi'r Archwilydd Cyffredinol i asesu i ba raddau y mae'r Cyngor yn gweithredu yn unol â'r egwyddor datblygu cynaliadwy wrth gymryd camau i gyflawni ei amcanion llesiant.
- 2 Gall yr archwiliad hwn oleuo astudiaeth ar gyfer gwella gwerth am arian dan adran 41 Deddf 2004 hefyd.

Ein hamcanion ar gyfer yr archwiliad hwn

- 3 Ein hamcanion ar gyfer yr archwiliad hwn yw:
 - darparu sicrwydd bod gan gynghorau drefniadau priodol ar gyfer comisiynu gwasanaethau i sicrhau gwerth am arian o ran y modd y maent yn defnyddio adnoddau;
 - darparu sicrwydd bod cynghorau'n gweithredu yn unol â'r egwyddor datblygu cynaliadwy wrth gomisiynu gwasanaethau; ac
 - egluro sut y mae cynghorau'n mynd ati i gomisiynu gwasanaethau ac ysbrydoli a grymuso cynghorau a chyrff eraill yn y sector cyhoeddus trwy adnabod a rhannu enghreifftiau o arfer/dulliau nodedig lle y bo'n berthnasol.
- 4 Rydym yn cynnal yr archwiliad hwn ym mhob un o'r 22 o brif gynghorau yng Nghymru.

Pam fod comisiynu'n bwysig

- 5 Comisiynu yw'r broses a ddefnyddir gan y Cyngor i ddylunio gwasanaethau y mae'n bwriadu eu darparu. Mae'n dechrau â diffinio'r gwasanaeth a'r allbynnau a deilliannau a ddymunir ac yn diweddu pan fo'r Cyngor yn trefnu ei ddull darparu. Er enghraifft, trwy sefydlu tîm darparu yn fewnol, neu drwy gaffael cyflenwr allanol.
- 6 Gall trefniadau comisiynu helpu i sicrhau bod gwasanaethau'n cael eu darparu mewn modd darbodus, effeithlon ac effeithiol. I'r gwrthwyneb, gall gwendidau mewn trefniadau comisiynu leihaus effaith gwasanaethau a'u gwerth am arian, hyd yn oed os yw'r prosesau sy'n dilyn, megis caffael a rheoli contractau, yn gadarn.



Yr hyn y gwnaethom fwrw golwg arno a sut y mae da'n edrych¹

- 7 Fe wnaethom adolygu trefniadau'r Cyngor ar gyfer comisiynu gwasanaethau ac yn benodol i ba raddau y mae hyn wedi cael ei ddatblygu yn unol â'r egwyddor datblygu cynaliadwy; ac y bydd yn helpu i sicrhau gwerth am arian o ran y modd y defnyddir adnoddau'r Cyngor.
- 8 Nid oedd yr archwiliad hwn yn cynnwys trefniadau caffael na threfniadau rheoli contractau'r Cyngor.
- 9 Roedd yr archwiliad yn ceisio ateb y cwestiwn cyffredinol hwn: **Wrth gomisiynu gwasanaethau, a yw'r Cyngor yn sefydlu trefniadau priodol i sicrhau gwerth am arian o ran y modd y mae'n defnyddio ei adnoddau?**
- 10 Fe ddefnyddiom ni'r meini prawf archwilio a nodir yn **Atodiad 1**, sydd hefyd yn dangos y berthynas rhwng y meini prawf a'r cwestiynau archwilio. Goleuwyd hyn gan ein gwybodaeth gronns yn ogystal â'r hierarchaeth gwestiynau a dangosyddion cadarnhaol yr ydym wedi'u datblygu i ategu ein harchwiliadau o gymhwyso'r Egwyddor Datblygu Cynaliadwy.



Ein dulliau archwilio a phryd y cynhaliom ni'r archwiliad

- 11 Mae ein canfyddiadau'n seiliedig ar adolygiadau o ddogfennau, a chyfweliadau gyda'r uwch swyddog(ion) sy'n gyfrifol am ddatblygu dull comisiynu strategol y Cyngor. Fe wnaethom hefyd gyfwrdd ag uwch swyddogion â chyfrifoldeb am wasanaethau y mae'r Cyngor wedi'u comisiynu'n allanol.
- 12 O ystyried yr ystod eang o wasanaethau sydd gan y Cyngor, fe wnaethom brofi sampl o'r trefniadau y mae'r Cyngor wedi'u sefydlu i gomisiynu gwasanaethau. I wneud hyn, fe ddewisom ni nifer o wasanaethau lle mae'r Cyngor wedi penderfynu comisiynu gwasanaethau'n allanol ac fe archwiliom ni'r trefniadau comisiynu y mae'r Cyngor wedi'u rhoi ar waith. Y sampl o feysydd gwasanaeth y gwnaethom eu hadolygu yn y Cyngor oedd:
 - Cymorth tai i ddioddefwyr trais yn erbyn menywod, cam-drin domestig a thrais rhywiol – Y Gyfarwyddiaeth Gwasanaethau Cymdeithasol, Tai a Diogelu'r Cyhoedd
 - Yr Adnodd Leadership Matters – Y Gyfarwyddiaeth Addysg

¹ Fe'i diffinnir fel 'yr hyn a ddylai fod' yn ôl deddfau neu reoliadau, 'yr hyn a ddisgwylir' yn ôl arfer gorau, neu 'yr hyn a allai fod', pe bai'r amodau'n well.

- Modiwl Refeniw a Budd-daliadau NEC – Y Gyfarwyddiaeth Gwasanaethau Cymdeithasol, Tai a Diogelu'r Cyhoedd

- 13 Mae'r dystiolaeth yr ydym wedi'i defnyddio i oleuo ein canfyddiadau'n gyfyngedig i'r ffynonellau hyn. Fe wnaethom y gwaith hwn yn ystod mis Tachwedd a mis Rhagfyr 2024.
- 14 Rydym yn gwneud y gwaith hwn ym mhob un o'r 22 o brif gynghorau yng Nghymru ac, yn ogystal ag adrodd yn lleol wrth bob cyngor, rydym hefyd yn bwriadu cynhyrchu adroddiad cenedlaethol.



Yr hyn a ganfuom

- 15 Ar y cyfan, canfuom nad oes gan y Cyngor drefniadau i fynd ati'n gyson i wneud yn siŵr y ceir gwerth am arian wrth gomisiynu gwasanaethau. Rydym yn nodi isod pam y daethom i'r casgliad hwn.
- 16 Dangosodd y Cyngor sail resymegol eglur dros gomisiynu gwasanaethau. Er enghraifft, mae darpariaeth Trais yn Erbyn Menywod, Cam-drin Domestig a Thrais Rhywiol y Cyngor yn ategu Strategaeth Cymorth Tai'r Cyngor (2022-26) sydd yn ei thro'n rhoi cymorth i gyflawni dyletswyddau statudol a deddfwriaeth. Fe wnaeth swyddogion y gwnaethom ni gyfweld â hwy fynegi'n glir hefyd sut yr oedd yr adnodd Leadership Matters yn gysylltiedig ag ymdrin ag argymhellion yn dilyn arolygiadau Estyn ac yn rhan o gynllun gwella ysgolion y Cyngor.
- 17 Fodd bynnag, nid oes gan y Cyngor drefniadau i sicrhau bod ystod o opsiynau'n cael eu hystyried wrth gomisiynu gwasanaethau. Canfuom anghysonderau o ran sut y mae gwahanol opsiynau comisiynu'n cael eu hystyried. Er enghraifft, er bod ystod o gyfluniadau wedi cael eu hystyried ar gyfer y gwasanaeth Trais yn Erbyn Menywod, Cam-drin Domestig a Thrais Rhywiol, ni chafodd unrhyw opsiynau eraill eu hystyried wrth gomisiynu'r adnodd Leadership Matters. Cafodd y contract hwn ei gaffael yn wreiddiol dan esemptiad yn 2020 ond ni ddogfennwyd y penderfyniad. Gan hynny, nid yw'n glir a gydymffurfiodd y Cyngor â rheolau ei weithdrefn gontractau ei hun yn yr achos hwn. Heb ddealltwriaeth eglur ac wedi ei dogfennu am y rheswm pam fo gwasanaethau'n cael eu comisiynu, yr hyn y maent wedi ei fwriadu i'w gyflawni, a'r gwahanol opsiynau sydd ar gael, ni all y Cyngor ddangos ei fod yn sicrhau gwerth am arian.
- 18 Nid yw'r Cyngor wastad yn ystyried yr hyn y mae hirdymor yn ei olygu wrth gynllunio ei ddull comisiynu. Er bod y Cyngor wedi dangos y cysylltiadau rhwng y gwasanaeth a gomisiynir a'r strategaeth berthnasol sy'n tanategu'r gweithgarwch, ni chanfuom ryw lawer o dystiolaeth fod costau oes gyfan contractau'n cael eu hystyried wrth gomisiynu. Mae ystyried goblygiadau hirdymor a goblygiadau byrdymor penderfyniadau comisiynu'n lleihau'r risg o beidio â chyflawni gwerth am arian dros y tymor hwy.
- 19 Mae'r Cyngor yn nodi'r trefniadau monitro y bydd yn eu dilyn ar gyfer ei wasanaethau a gomisiynir. Roedd dystiolaeth hefyd o werthuso a monitro

contractau'n barhaus ar draws y gwasanaethau a adolygwyd. Er enghraifft, yn y gwasanaethau cymdeithasol mae atodlen fonitro ffurfiol gyda'r darparwr yn nodi'r gofynion i fonitro, gwerthuso ac adolygu. Yn yr un modd, roedd yr adnodd Leadership Matters yn allweddol i weithredu Cynllun Gwasanaeth Tymor Canolog Gwella Ysgolion y Cyngor, sy'n cael ei fonitro'n barhaus.

- 20 Fodd bynnag, nid oes gan y Cyngor drefniadau i sicrhau bod effeithiau ehangach ei benderfyniadau comisiynu'n cael eu hystyried bob amser. Er bod ffurflen gofnodi'r Cyngor ar gyfer ymarferion tendro'n ysgogi rheolwyr contractau i ddogfennu pa un a roddwyd ystyriaeth i Ddeddf Llesiant Cenedlaethau'r Dyfodol, nid yw'n dangos sut y mae amcanion llesiant y Cyngor, rhai ei bartneriaid, a'r nodau llesiant cenedlaethol wedi goleuo'r penderfyniad comisiynu. Ar ben hynny, dim ond unwaith y mae'r opsiwn a ffefrir wedi cael ei ddewis a'r tendr ar gyfer y gwasanaeth wedi cael ei gyhoeddi y mae hyn yn digwydd. Hefyd, dim ond ar gyfer ymarferion â gwerth o fwy na £25,000 y mae'n ofynnol cwblhau'r ffurflen. Yn yr un modd, mae'r Asesiad Risg Cynaliadwyedd a gyflwynwyd gan y Cyngor yn ddiweddar fel rhan o Reolau newydd ei Weithdrefn Contractau'n canolbwyntio ar gaffael ac nid yw'n sicrhau bod effeithiau ehangach ei benderfyniadau comisiynu'n cael eu hystyried bob amser. Gall ystyried goblygiadau ehangach penderfyniadau comisiynu helpu'r Cyngor i osgoi dyblygu ac adnabod manteision lluosog sy'n sicrhau deilliannau gwell a mwy o werth am arian.
- 21 Nid oes gan y Cyngor drefniadau i sicrhau ei fod yn cydweithio gyda'r bobl a'r partneriaid iawn i ddylunio a darparu'r gwasanaethau a gomisiynir ganddo. Yn y gwasanaethau a adolygwyd gennym ni, roedd y Cyngor wedi ymgysylltu â rhanddeiliaid i ddeall gofynion defnyddwyr wrth gomisiynu gwasanaethau. Er enghraifft, roedd y gwasanaeth tai wedi defnyddio adborth o arolygon bodlonrwydd cwsmeriaid i gasglu barn ynglŷn â blaenoriaethau allweddol defnyddwyr i helpu i roi arweiniad i gyflwyno modiwlau ar-lein ymhellach. Fodd bynnag, ceir anghysondeb yn y dull o ddadansoddi rhanddeiliaid ac ymgysylltu â hwy wrth ystyried opsiynau comisiynu. Mae cydweithio gyda'r bobl a'r partneriaid iawn yn gallu helpu'r Cyngor i sicrhau ei fod yn comisiynu gwasanaethau sy'n diwallu anghenion ei gymunedau, a bod y gwasanaethau hynny'n cael eu darparu mewn ffordd sy'n cael y gwerth mwyaf posibl am arian.
- 22 Nid oes gan y Cyngor drefniadau i fynd ati mewn modd cyson i werthuso gwerth am arian ei ddull comisiynu. Er bod tystiolaeth ar lefel gwasanaethau bod rheolwyr contractau'n adolygu effeithiolrwydd eu dull comisiynu, nid oes trefniant i ysgogi hyn i ddigwydd mewn modd cyson ar draws yr holl wasanaethau.
- 23 Ni chanfuom rhyw lawer o dystiolaeth ychwaith bod y Cyngor yn mynd ati fel rhan o'r drefn arferol i rannu gwersi a ddysgwyd ar draws y sefydliad na chyda phartneriaid. Er bod tystiolaeth yn y gwasanaethau cymdeithasol o adolygu arferion comisiynu, roedd rhannu gwersi a ddysgwyd yn gyfyngedig i'r maes gwasanaeth ac nid oedd unrhyw dystiolaeth o hyn yn digwydd yn rheolaidd ar draws y Cyngor. Mae gwerthuso cost ac effeithiolrwydd trefniadau comisiynu'n bwysig i helpu i adnabod meysydd ar gyfer gwella, rhannu gwersi, ac felly helpu i sicrhau gwerth am arian.

Ein hargymhellion i'r Cyngor

Arddangosyn 1: ein hargymhellion i'r Cyngor

Argymhellion

A1 I alluogi'r Cyngor i asesu ac adrodd ar werth am arian gwasanaethau a gomisiynir, dylai sefydlu dull systematig o arfarnu'r opsiynau i ategu prosesau penderfynu mewn perthynas â gwasanaethau a gomisiynir. Dylai'r sail resymegol dros benderfyniadau comisiynu:

- gael ei dogfennu'n llawn;
- cael ei goleuo gan ystyriaeth i ffactorau byrdymor a hirdymor;
- cael ei goleuo gan farn y rhai y byddai'r gwasanaeth a gomisiynir yn effeithio arnynt; a
- mynd trwy broses asesu risg gan ystyried costau a manteision llawn pob opsiwn.

A2 Nid yw'r Cyngor yn mynd ati fel rhan o'r drefn arferol i werthuso prosesau comisiynu a rhannu'r gwersi a ddysgwyd. I fynd i'r afael â hyn, dylai'r Cyngor sefydlu trefniadau i:

- fynd ati'n systematig i werthuso gwerth am arian ei ddull comisiynu gwasanaethau; a
- rhannu gwersi a ddysgwyd o werthuso ei ddull comisiynu ar draws adrannau a chyda phartneriaid allanol lle y bo'n berthnasol.

Atodiad 1

Cwestiynau a meini prawf archwilio

Cwestiwn cyffredinol: Wrth gomisiynu gwasanaethau a yw'r Cyngor yn sefydlu trefniadau priodol i sicrhau gwerth am arian o ran y modd y mae'n defnyddio ei adnoddau?

Cwestiynau Lefel 2	Cwestiynau Lefel 3	Meini Prawf
A oes gan y Cyngor resymeg eglur dros gomisiynu gwasanaethau?	A yw'r Cyngor yn diffinio'n glir pa wasanaethau y mae'n bwriadu eu comisiynu a pham?	• Mae'r Cyngor yn nodi diffiniad clir o'r gwasanaethau y mae'n bwriadu eu comisiynu • Mae'r Cyngor yn nodi 'pam' fod arno angen comisiynu'r gwasanaethau gan gynnwys: – effaith/deilliannau bwriadedig darparu'r gwasanaeth – a fydd/sut y bydd y gwasanaeth yn helpu'r Cyngor i gyflawni ei ddyletswyddau statudol
	A yw'r Cyngor yn cynnal arfarniad cynhwysfawr o'r opsiynau comisiynu cyn penderfynu comisiynu gwasanaeth?	• Mae'r Cyngor yn ystyried yr ystod lawn o opsiynau comisiynu ar gyfer darparu'r gwasanaeth – gallai'r opsiynau gynnwys y canlynol, er enghraifft: – darpariaeth fewnol – trefniadau partneriaeth neu ddulliau o gomisiynu o fewn ac ar draws sectorau – allanoli'r gwasanaeth i ddarparwr arall trwy ymddiriedolaeth neu drefniant arall – contractio'r gwasanaeth trwy broses dendro • Mae'r Cyngor yn ystyried costau a manteision yr opsiynau o safbwynt darbodaeth, effeithlonrwydd ac effeithiolrwydd – gan gynnwys dros y tymor byr, canolig a hir • Mae'r Cyngor yn cynnwys costau rheoli contract o fewn ei asesiad o opsiynau comisiynu • Mae'r Cyngor yn cynnwys asesiad o risg ar gyfer pob opsiwn comisiynu fel rhan o asesu costau a manteision • Mae'r Cyngor yn defnyddio amrywiaeth eang o wybodaeth o ffynonellau mewnol ac allanol i ddatblygu dealltwriaeth am y ffactorau cyffredol a hirdymor sy'n debygol o effeithio ar wasanaethau a gomisiynir

A yw'r Cyngor yn cynllunio dros raddfa amser briodol?	A yw'r Cyngor yn ystyried beth mae hirdymor yn ei olygu wrth gomisiynu gwasanaethau?	• Mae'r Cyngor yn ystyried beth mae hirdymor yn ei olygu wrth gynllunio ei ddull o gomisiynu gwasanaethau – h.y. pa mor bell ymlaen all/ddylai gynllunio a pham • Mae'r Cyngor yn ystyried sut y bydd yn taro cydbwysedd rhwng anghenion byrdymor a hirdymor wrth gynllunio ar gyfer comisiynu gwasanaethau gan gynnwys, er enghraifft, wrth bennu'r ffrâm amser ar gyfer contractau neu drefniadau comisiynu eraill
	A yw'r Cyngor yn deall y goblygiadau hirdymor o ran adnoddau wrth gomisiynu gwasanaethau?	• Mae'r Cyngor yn meddwl am yr adnoddau y bydd eu hangen arno dros y tymor canolig a hwy (costau oes gyfan) i ddarparu gwasanaethau a gomisiynir • Mae'r Cyngor yn ystyried sut y gellid gweithredu ystod o senarios lleihau cyllideb yn y dyfodol mewn perthynas â gwasanaethau a gomisiynir
	A yw'r Cyngor yn nodi sut y bydd yn monitro gwerth am arian gwasanaethau a gomisiynir dros y tymor byr, canolig a hir?	• Mae'r Cyngor yn nodi'r trefniadau monitro y bydd yn eu dilyn ar gyfer y gwasanaeth a gomisiynir • Dylai'r Cyngor ddisgrifio sut y bydd gwerth am arian gwasanaethau a gomisiynir yn cael ei asesu a'i fonitro gan gynnwys: – costau a manteision – cynnydd tuag at gerrig milltir a mesurau tymor byr, canolig a hwy
A yw'r Cyngor wedi meddwl am yr effeithiau ehangach y gallai ei wasanaeth a gomisiynir eu cael?	Wrth gomisiynu gwasanaethau, a yw'r Cyngor yn ystyried sut y gall gynyddu eu cyfraniad at amcanion llesiant y Cyngor i'r eithaf?	• Mae'r Cyngor yn ystyried sut y bydd gwasanaethau a gomisiynir yn effeithio ar ei holl amcanion llesiant ei hun i sicrhau manteision lluosog, osgoi dyblygu neu unrhyw ganlyniadau anfwriadol, e.e. ystyried amcanion tymor hwy, y gadwyn gyflenwi leol, cydnerthedd y farchnad ac effaith hyd contractau, bioamrywiaeth, a lleihau carbon
	Wrth gomisiynu gwasanaethau, a yw'r Cyngor yn ystyried sut y gall gwasanaethau gynyddu eu cyfraniad at amcanion llesiant cyrff eraill yn y sector cyhoeddus i'r eithaf?	• Mae'r Cyngor yn ystyried sut y bydd gwasanaethau a gomisiynir yn effeithio ar amcanion llesiant cyrff eraill yn y sector cyhoeddus i sicrhau manteision lluosog ac osgoi dyblygu neu unrhyw ganlyniadau anfwriadol
	Wrth gomisiynu gwasanaethau, a yw'r Cyngor yn ystyried sut y gall gwasanaethau gynyddu eu	• Mae'r Cyngor yn ystyried sut y bydd gwasanaethau a gomisiynir yn effeithio ar y nodau llesiant cenedlaethol i sicrhau manteision lluosog ac osgoi dyblygu neu unrhyw ganlyniadau anfwriadol

	cyfraniad at y Nodau Llesiant Cenedlaethol i'r eithaf?	
A yw'r Cyngor yn gweithio gyda'r bobl a'r partneriaid iawn i ddylunio a darparu ei wasanaethau a gomisiynir?	A yw'r Cyngor wedi adnabod pwy y mae angen iddo eu cynnwys?	Mae'r Cyngor yn deall pwy fydd gwasanaethau a gomisiynir yn effeithio'n uniongyrchol ac yn anuniongyrchol arnynt. Goleuwyd hyn gan ddadansoddiad rhanddeiliaid neu ymarfer tebyg.
	A yw'r Cyngor yn cynnwys yr amrywiaeth lawn o bobl?	- Mae'r Cyngor yn cynnwys yr amrywiaeth lawn o safbwyntiau wrth benderfynu sut i gomisiynu gwasanaethau. - Mae'r Cyngor yn defnyddio canlyniadau gweithgarwch cynnwys i oleuo sut y bydd yn comisiynu gwasanaethau, gan gynnwys ei effaith ar grwpiau sy'n rhannu nodweddion gwarchodedig
	A yw'r Cyngor yn cydweithio gyda'r partneriaid cywir?	- Mae'r Cyngor yn deall yn dda pa bartneriaid a pha bartneriaid posibl y gallai weithio gyda hwy i gomisiynu gwasanaethau i wella gwerth am arian. Goleuwyd hyn gan ddadansoddiad cynhwysfawr o bartneriaid posibl a'u blaenoriaethau - Lle mae cyfleoedd i wella gwerth am arian trwy gomisiynu gwasanaethau mewn partneriaeth yn cael eu hadnabod, mae'r Cyngor yn mynd ar eu trywydd
A oes gan y Cyngor drefniadau i werthuso gwerth am arian ei ddull comisiynu?	A yw'r Cyngor yn mynd ati fel rhan o'r drefn arferol i werthuso effeithiolrwydd ei drefniadau comisiynu?	- Mae'r Cyngor yn adolygu effeithiolrwydd ei ddull comisiynu'n rheolaidd gan gynnwys: - i ba raddau y mae gwasanaethau a gomisiynir yn cyflawni'r amcanion y mae'r Cyngor wedi'u pennu - gwerth am arian modelau comisiynu a ddewiswyd gan gynnwys ystyried mewnbynnau, allbynnau a deilliannau
	A yw'r Cyngor yn mynd ati fel rhan o'r drefn arferol i rannu unrhyw wersi a ddysgwyd i oleuo ymarferion comisiynu yn y dyfodol?	Mae'r Cyngor yn rhannu ac yn cymhwyso unrhyw wersi a ddysgwyd o'i ddull comisiynu yn eang ar draws y sefydliad, a chyda phartneriaid lle y bo'n berthnasol.



Archwilio Cymru

1 Cwr y Ddinas

Caerdydd CF10 4BZ

Ffôn: 029 2032 0500

Ffacs: 029 2032 0600

Ffôn testun: 029 2032 0660

E-bost: post@archwilio.cymru

Gwefan: www.archwilio.cymru

We welcome correspondence and telephone calls in Welsh and English.
Rydym yn croesawu gohebiaeth a galwadau ffôn yn Gymraeg a Saesneg.